



सा:गु भिंगु मरिचरिया नितिं लुमंका दिसै !

लक्ष्मण गजाल /चिलिमि'
प्रोप्राइटर

लाखा छै
LAKHA CHHEN

सोहखुटे, वडा नं. १६, यै, फोन नं.: ४५६०७५८

मेयर बालेनया ज्याय् उपमेयरया असन्तुष्टी

स्वला न्ह्य:निसैया तलब मव:गुलिं कर्मचारीतय्त समस्या

● **लहना संवाददाता**
लहना वा:पौ/यै
महानगरपालिकाया प्रमुख प्रशासकीय अधिकृत नियुक्तियात कया: मेयर बालेन साहं बिउगु अभिव्यक्तियात कया: उपमेयर सुनिता डंगोलं असन्तुष्टि प्वकादीगु दु। उपमेयर डंगोलं छानबिन समितिया प्रतिवेदन सुचुका: मेपित दोष बीगु उचित मजू धासै असन्तुष्टि प्वकादीगु ख:।

वंगु छुं न्हि न्ह्य: मेयर साहं प्रमुख प्रशासकीय अधिकृत छ्वयामह: धासै प्रधानमन्त्री केपी शर्मा ओली विरुद्ध सामाजिक सञ्जालय् असन्तुष्टि प्वकूगु ख:। मेयर साहं सामाजिक सञ्जालय् प्वपंकादीगु असन्तुष्टियात कया: उपमेयर डंगोलं मेयर साहया ज्यायात कया: कुँ खिनादीगु ख:।

उपमेयर डंगोलं मेयर साहं थम्हं हे छानबिन समितिया प्रतिवेदन सुचुका: दोष मेपित बिउगु उचित मजूगु खँ धयादीगु ख:। यै महानगरपालिकाया प्रमुख प्रशासकीय अधिकृत सरोज गुरागाई पुलांगु बसपार्कय् दयेकाच्चंगु भवनया नक्सा प्रक्रिया पूमवकूसे पास या:गु धासै गुरागाईयात बिदाय् तया: छानबिन न्ह्याकूगु ख:। मेयर साहं



उगु प्रतिवेदन धा:सा सार्वजनिक या:गु मदुनि।

पुलांगु बसपार्कय् दयेकाच्चंगु भवनया नक्सा पास यायेगु नितिं मेयर साहं न्हापां हे अनुमति बियातये धुंकूगु ख:सा प्रमुख प्रशासकीय अधिकृत गुरागाई उकियात सदर यायेगु निर्णय या:गु ख:। तर मेयर

साहं प्रक्रिया पूमवकूसे फाइल सदर या:गु धासै प्रमुख प्रशासकीय अधिकृत गुरागाईयात कया: छानबिन या:गु ख:। तर छानबिनया इवलय् गुरागाईया छुं नं कथंया दोष खने मदयेवं मेयर साहं उगु फाइल सुचुकेगु ज्या या:गु ख:।

उपमेयर डंगोलं थ:गु प्रतिक्रिया बीगु इवलय् धयादिल, 'छानबिन

समितितं छु यायेगु धका: क्व: मछितले केन्द्र सरकारं छ्वयाहम्ह प्रमुख प्रशासकीय अधिकृतयात दोष बीगु, कारबाही यायेगु वा गुरागाईया पलेसा मेपित छाय् छ्वया महल धका: निरन्तर द्वपं बीगु बांला:गु ज्या मखु। थम्हं कर्तव्य पूमवकेगु अले मेपित दोष बीगु पाय्छिगु खँ मखु।'

उकथं उपमेयर डंगोल धयादीगु दु, 'दकलय् न्हापां छानबिन समितिया प्रतिवेदन सार्वजनिक जुइमा:। छानबिन समितिया प्रतिवेदनय् वय्क:या कमजोरी खन धा:सा तुरुन्त कारबाही प्रक्रिया न्ह्याकेमा: धइगु खँय् निगू मत मदु। तर, प्रतिवेदन सार्वजनिक मयायेगु अले केन्द्र प्रमुख प्रशासकीय अधिकृत छ्वयामह: धका: विरोध यायेगु खँ जुइ मखु।'

उपमेयर डंगोलं छानबिन प्रतिवेदनय् प्रमुख प्रशासकीय अधिकृत जक मखुसे षडयन्त्र या:गु ख:सा उकियात कया: निष्पक्ष छानबिन यायेमा:गु खँ नं धासै धयादिल, 'समग्र प्रक्रियाय् छम्ह जक व्यक्तिया ब्वति दुगु ख:कि मेपित नं दु धइगु खँ सीका: उमित नं कारबाहीया दायराय् हयेमा:। संगठित भ्रष्टाचारया आधारय् खने दतधा:सा उकियात कया: नं छानबिन याना: कारबाही यायेमा: धका: जिं न्हापां नं धयागु ख:। आ: नं जिगु धापू व हे ख:।'

यै महानगरपालिकाय् प्रमुख प्रशासकीय अधिकृत मदुगुलिं याना: अनया कर्मचारीतय्सं वंगु स्वला न्ह्यव ल्यं ७ पेजय्

खोनाया संघर्षयात कया: च्वयात:गु सफू पिदन

लहना वा:पौ/ हलिं नेवा: दबू नेपा: देय् मूकव:या खसालय् खोकनाय् भूमि रक्षाया नितिं जूगु संघर्षया सम्बन्धय् अनिल रंजित च्वयादीगु किपा: सफू वंगु शुक्रवा: शुक्रवा: यल संग्रहालय विमोचन या:गु दु।

यल मनपाका प्रमुख चिरीबाबु महर्जनया मुपाहांसुइ जूगु ज्याइवलय् यल मनपा २१ वडाया अध्यक्ष रविन्द्र महर्जन, यै महानगरपालिका १२

वडाया अध्यक्ष बालकृष्ण महर्जन, दबूया संरक्षक प्रा.डा. प्रेमशान्ति तुलाधरया लिसे विशिष्ट व्यक्तित्वपिसं ब्वति कयादीगु ख:।

ज्याइवलय् न्ववायेगु इवलय् मुपाहां लिसे मेयर महर्जन थ: खोनाया भूमि रक्षाया नितिं तत्पर दुगु खँ धासै लिपांगु इलय् यलया खुमलटारय् बाहेक मेगु थासय् कृषिभूमिया रुपय् वर्गीकरण यायेमफूगु खँ धयादीगु दु। वय्कलं

त्यं ७ पेजय्





नेवा: राष्ट्रिय म्ये

चवमि : दुर्गालाल श्रेष्ठ लय् चिनामि : तिर्थ माली

धुन देने धुन सँन्त्यलं भी फुक्कं हे छम्ह जुइ धुन
भीगु लागाय् भी स्वयं हे जः जुया धुन लुइ धुन
ह्यांगु भुमिइ अष्टमण्डल ह्यांगु चाः दुने थी नगु
भीगु नेवाः ध्वाँय् थ्व हे खः ज्यान भी सकस्यां छगू
जातितय् स्वायत्त राज्यं लुइ कपं च्वय् भिलिमिलिं
राष्ट्र भःभः धाय्क न्त्याके भीगु चःतिं भीगु हिं

सम्पादकीय



कार्यसम्पादनय् लिउने लानाच्वंगु प्रदेश सरकार

राष्ट्रिय प्राकृतिक श्रोत तथा वित्त आयोगया प्रतिवेदनं न्हय्गू हे प्रदेशया कार्यसम्पादन प्रणालीया न्हय्कं कयःगु दु । आर्थिक दँ २०८०/८१ या प्रदर्शन मूल्यांकनय् दक्कं प्रदेश थःपिगु ल्याः हःगु दु । आयोगं प्रदेश व स्थानीय तहयात संघीय सरकारं ब्यूगु आर्थिक समानीकरण अनुदानया प्रयोजनया नितिं थीथी ११ गू सूचकया आधारय् प्रदेशया कार्यसम्पादनया मूल्यांकन याःगु इलय् प्रदेश बांमलाःगु ल्याः जक काःगु खः । प्राविधिक रुपं छगू प्रदेश न्हापांगु वा लिपांगु खनेदःसां यथार्थय् फुक्क प्रदेशया अवस्था उत्साहजनक मज्गु स्पष्ट दु । उकिं प्रादेशिक सरकारया मेगु आज्जु उत्कृष्ट ल्याः हयेगु जुइमाः । यदि छिं थःगु लक्ष्य व जिम्मेवारीइ सफलता प्राप्त यायेत व्यावहारिक रणनीति दयेकल व उकियात कडा रुपं पालना याःसा जक प्रदर्शन मूल्यांकनय् उत्साहजनक स्कोर प्राप्त यायेफइ ।

आयोगं लेखापरीक्षण, बजेट, पूँजीगत बजेट विनियोजन व खर्च, राजश्व संकलनया लक्ष्य व उपलब्धि, संघीय व स्थानीय तहलिसेया समन्वयया आधारय् प्रदेशया कार्यसम्पादनया मूल्यांकन याःगु दु । उकिइ सुदूरपश्चिम प्रदेशं दकलय् अप्वः ५१.६ ल्याः, कोशीं ५०.९, बागमतीं ४५.६, कर्णालीं ४१.६, गण्डकीं ४०.८, लुम्बिनी ३५.९ व मधेश ३० ल्याः हःगु खः ।

थ्व निकायं वायु गुणस्तरया सूचकय् उल्लेखनीय योगदान बीमफु । अथे हे वन व्यवस्थापन, राजस्व संकलन थेंज्याःगु ज्याय् नं कमजोर खनेदु । प्रादेशिक कानून व आयोगं क्वःछ्यगु अवधारणा कथं स्थानीय तहयात सःशर्त अनुदान मबीगु प्रवृत्ति दु । अर्थ मन्त्रालययात बीमाःगु विवरण तक प्रदेशं मब्यगु लगु दु । गुलिखे प्रदेशय् थःगु हे शैलीया कारणं कमजोरी खनेदु । गथे कि मधेशं २०७९/८० य् ४७ अर्ब ९५ करोडया लेखापरीक्षण याःगु खःसा १ अर्ब ८५ करोडया हिसाब मदुगु खनेदु । अथे हे लुम्बिनी प्रदेशं प्यंगू सूचकया विवरण आयोगय् बुभ्ने मयाःगु व स्वंगू सूचकया गलत रुपं भरे याःगु लगु दु । थुकिं यानाः सम्बन्धित प्रदेशं प्राप्त याःगु ल्याः म्हो जूगु दु । वार्षिक मूल्यांकनय् प्रदेशं वःगु ल्याःचाः च्वय् क्वय् जुइगु स्वाभाविक खः । तर कमजोर प्रदर्शनया जिम्मेवारी कायेगु अवस्थाय् प्रादेशिक सरकार मदुगु अस्वाभाविक खः । छायाःसा, संघीय सरकार चले याइगु पार्टी समीकरणय् हिउपाः वयेवं हे उकिया लिच्चः प्रदेशय् लानाच्वनी । थगुने फागुनय् व थुगुसी असारय् संघीय सरकार चलेयाःगु पार्टीतय्गु संरचनाय् वःगु हिउपाः या 'सहउत्पादन' हे न्हय्गू हे प्रदेशय् आःया सरकार खः ।

अथे हे स्वयेगु खःसा बैशाख २७ गते, कोशीइ जेष्ठ २५ य् मधेशय् श्रावण ९ गतेय् बागमतीइ, जेष्ठ १६ गतेय् गण्डकीइ, श्रावण ६ गतेय् लुम्बिनीइ, कर्णालीइ २८ चैत्रय्, सुदूरपश्चिमय् २१ गते न्ह्यु सरकार दयेकूगु खः । उकिइ सम्बन्धित प्रदेशं हःगु ल्याः कथं प्रदेशी सरकार जिम्मेवार जुइम्बाः । न्हापाया सरकारयात कमजोरी धकाः बर्खास्त यायेत ताःलाःगु दु । आः वइगु कार्यसम्पादन मूल्यांकनया लिच्चः सार्वजनिक जुइवं आः सत्ताय् च्वपिनिगु नेतृत्वया सरकार सत्ताय् हे च्वनी धकाः अनुमान यायेगु आधार मदु । थुकिं नं प्रादेशिक सरकारयात थःगु ज्याया नितिं जिम्मेवार दयेकूगु दु, न जवाफदेही जुइमाःगु बाध्यता ब्वलंगु दु । प्रदेशय् कर्मचारी अभावया समस्या दु । थुकिं प्रादेशिक नीति व कार्यक्रम कार्यान्वयन यायेत समस्या ब्वलनी । थुज्वःगु खँय् संघीय सरकार व राजनीतिक पार्टीत गम्भीर जुइमाः ।

थःगु ज्याया विवरण अपडेट यायेमाः । सुधारया नितिं कुतः यात धाःसा गुकथं सफलता प्राप्त जुइ धइगु छगू उदाहरण सुदूरपश्चिम प्रदेश खः । आर्थिक दँ २०७९/८० य् १० गू सूचकया आधारय् मूल्यांकन यायेबलय् सुदूरपश्चिम प्रदेशं २१.०८ ल्याः जक हयाः न्यागूगु थासय् लाःगु खः । थुगुसी व हे प्रदेश न्हाप जुइत ताःलाःगु खः । प्रदेशतसें थःथम्हं हे प्रतिस्पर्धी भावना विकास याये फयेकैमाः । उगु इलय्, दक्कं प्रदेशय् बांलाःगु ल्याः कायेत सम्भावना दु ।

गायक कुमा सागर व भाषिक मानवाधिकार-१



गणेश राई

‘भाषा विचार विनिमयया साधन जक मखुसे, संस्कृतिया वाहक, ज्ञान लिसे सभ्यताया खानी नं खः’ धइगु पाखे सकसिया ध्यानाकर्षण जुइमाः । तर, भीगु नेपाःया समाजय् उगु चेतनायात भद्दा मजाकया रूपय् कायेगु याः । नर्कतिनि ‘फेब्रुअरी २१ : अन्तर्राष्ट्रिय मातृभाषा दिवस’ न्यायेका च्वनागु इलय् नेपालय् ल्हाइगु मातृभाषा व सामाजिक मूल्यमान्यतया शब्दय् जूगु वा याःगु अज्याःगु भद्दा मजाकयात भाषा वैज्ञानिक डा. तारामणि राई समाजया ध्यानाकर्षण याकूगु दु । लिपांगु घटनाक्रम थुकथं दु ।

घटना-१ नेवाः टोनय् मजाक

‘गायक कुमा सागरयात गिजे याःगु द्वपनय् स्वम्ह कमेडियन विरुद्ध प्रहरीइ निवेदन’

नेपालभाषाया लवजय् म्ये हाम्ह गायक कुमा सागरयात गिजे याःगु द्वपनय् स्वम्ह कमेडियन विरुद्ध प्रहरीइ निवेदन दर्ता याःगु दु । नेवाः समुदायया व्यक्तिपिं कमेडियन सजन श्रेष्ठ, सुशान्त प्रधान व उ त स व

सापकोटा विरुद्ध निवेदन बिउगु दु । कुमा सागरयात गिजे यानाः मुक्कं नेवाः समुदायया आत्मसम्मानय् घाः लाःगु निवेदनय् दाबी यानातःगु दु (रातोपाटी डटकम २०८१ फागुन ५) ।

‘गायक कुमा सागरयात गिजे याःपिंत कारबाही मयाःगु धासें प्रदर्शन’ नेपालभाषाया लवजय् म्ये हाम्ह गायक कुमा सागरयात गिजे याःगु द्वपनय् स्वम्ह कमेडियन विरुद्ध प्रहरीइ निवेदन दर्ता याःगु दु ।

स्वपया कुमा सागर छम्ह प्रतिभाशाली नेपाःमि

गायक खः । वय्कःया पूर्वगु नां सिद्धि

सागर प्रजापति खः । थःगु हे सांगीतिक ब्याण्ड

‘कुमा सागर एण्ड द स्वपः’ दु । वय्कलं

नेवाः परम्परागत व आधुनिक संगीतया बिस्कं

मिश्रण न्हयब्वयाः नेपाःया संगीत क्षेत्रय् बिस्कं

पहिचान दयेकूगु दु ।

गायक कुमा सागरयात गिजे याःपिंत कारबाही मयागु धासें सम्पदा संरक्षण महाअभियानं बिहीवाः जिल्ला प्रहरी परिसर यँय् प्रदर्शन याःगु दु । नेपालभाषाया लवजय् म्ये हाम्ह गायक कुमा सागरयात गिजे याःगु द्वपनय् प्यम्ह विरुद्ध प्रहरीइ निवेदन दर्ता याःगु दु । उमिसं कमेडियन सजन श्रेष्ठ, सुजन जिम्बा र उत्सव सापकोटासहित पोडकास्ट चले याइम्ह सुशान्त प्रधान विरुद्ध निवेदन बिउगु खः । कुमा सागरयात गिजे यानाः मुक्कं नेवाः समुदायया आत्मसम्मानय् घाः लाःगु निवेदनय् दाबी याःगु दु । (स्रोतः रातोपाटी डटकम)

स्वपया कुमा सागर छम्ह प्रतिभाशाली नेपाःमि गायक खः । वय् कःया पूर्वगु नां सिद्धि सागर प्रजापति खः । थःगु हे सांगीतिक ब्याण्ड ‘कुमा सागर एण्ड द स्वपः’ दु । वय् कलं नेवाः परम्परागत व आधुनिक संगीतया बिस्कं मिश्रण न्हयब्वयाः नेपाःया संगीत क्षेत्रय् बिस्कं पहिचान दयेकूगु दु । ‘ओ चम्पा गन वाना’, ‘फुरफुरी’, ‘चमेली फूल’ लगायत उत्कृष्ट म्ये हाःगु दु, गुगु युट्युबय् दुहां वनाः न्येनेगु, देख्न, सास्वादन याये फइ । मेटलर्निसे भजन तक म्ये हालेगु इवलय् धिमे, छुस्या, भुछ्या, खिं थेंजाःगु परम्परागत बाजा अले स्वपया नेवाः परम्परायात न्हयब्वयेगु ज्या जूगु दु । वय् कःया शब्दय् थः बाज्यां भजन हालिगु खः । मां नं हा धाइगु । गितार सयेकाच्वंगु इलय् थःत थम्हं हिरो तायेकीगु । वय् कः गायक व संगीतकार निगुलिं खः । परम्परागत लोकबाजा व भजन संगीतया शक्ति ज्वनाः वय्कः नेपाःया संगीतया सर्गतय् सुर्छिः जुयाः लुयाच्वंगु दु ।

घटना-२ ‘ढोग दियाँ’

वंगु मंसिरय् चर्चित टिकटकर आयुष सिंह ठकुरी व वय्कःया मां नानु दथुइ जूगु जुहारी टिकटकय् भाइरल जूगु खः ।

उगु ज्या ताः ई तक जूगु खः । उगु इलय् नानु नं भाइरल जुल । विवादया हे इवलय् सामाजिक सञ्जालं ‘ट्रोल’ जुइधुंकाः आयुष व कलाः एलिजे जमाली टिकटकं छुं ई पिहां वन । व हे आयुषया मां नानु टिकटक लिसे सामाजिक सञ्जालय् थःगु अभिव्यक्ति बीगु इवलय् न्हापां ‘नमस्ते, ढोग दियाँ’ धायेगु यात । वया नक्कल यासें सामाजिक सञ्जालया भिडं थुगु शब्द छ्यलेगु यात । (पुष्प भट्टः २०८१ पुस

२४, नागरिकन्यूज)।

सुदूरपश्चिम व कर्णालीया जःखः सतिपिं हनेबहःपिंत शिष्टाचार एवं आदरार्थी शब्दया रूपय् ‘ढोग दियाँ’ शब्द छ्यलेगु याइ । सामाजिक मूल्यमान्यतां जाःगु शब्दयात यःयःथे याःगु मजाकं सुदूरपश्चिम क्षेत्रया सांस्कृतिक अभियन्ता लिसे समुदायया ध्यानाकर्षण यात । देउडा संस्कृति संरक्षण प्रतिष्ठानं ‘ढोग दियाँ’ शब्दया दुरुपयोग जूगु व सुदूरपश्चिमया मौलिकता, संस्कार व भाषा संस्कृतियात क्वह्थंकेगु म्ये-सङ्गीत प्रति खेद प्वंकल । ‘जिमिगु परम्परा मौलिकता सभ्यता व संस्कारलिसे स्वानाच्वंगु ओजपूर्ण शब्दयात शिष्टताया खिल्ली उडे यायेगु व अपहेलित यायेगु कथं दुरुपयोग लिसे निह्थं काली कर्णालीया संस्कारया बेइज्जत जुइ कथं थीथी सामाजिक सञ्जालय् प्रकाशन व प्रसारण याना वयाच्वंगु अपाच्य म्ये, सङ्गीत वा सामाजिक सञ्जालय् दुगु विषय वस्तुप्रति गम्भीर आपत्ति प्वंकाच्वना ।’ प्रतिष्ठानं विज्ञापितइ धयातःगु दु ।

सुदूरपश्चिम प्रदेश सरकारया सुदूरपश्चिम प्रज्ञा-प्रतिष्ठानं ‘ढोग दियाँ’ शब्दया खिल्ली उडे यायेगु खेदपूर्ण जूगु धासें विज्ञापित पिकाल ।

उकथं हे सुदूरपश्चिम प्रदेश सरकारया सुदूरपश्चिम प्रज्ञा-प्रतिष्ठानं ‘ढोग दियाँ’ शब्दया खिल्ली उडे यायेगु खेदपूर्ण जूगु धासें विज्ञापित पिकाल । ‘सुदूरपश्चिम व कर्णालीया जःखः सतिपिं हनेबहःपिंत शिष्टाचार एवं आदरार्थी शब्दया रूपय् ‘ढोग दियाँ’ शब्द छ्यलेगु याइ । थ्व अतिकं शिष्टाचारया शब्द खः । फुकसितं ढोग याइमखु । लिपांगु इलय् गुगुं जाति समुदाय व भूगोलयात अपमानित जु इकथं ‘ढोग दियाँ’ शब्द थीथी सामाजिक सञ्चालन, स्टेज ज्याइवः, टिकटक व म्ये सङ्गीतय् छ्यलेगु गलत ज्या खः । थज्याःगु कथंया अस्वाभाविक लिसे अपमानित जुइगु ज्या खँ मयायेत मयाकेत प्रतिष्ठान सम्बन्धित फुकसित अपिल यानाच्वना ।’ कथं

होलीं जात्रा याइम्ह चकंद्यः



નાતિકાજી મહર્જન

लिपा अनं
लं दथ्वी हे
क्यान्टेन दय्काः
लुखा तयाबिसेंलि
घःयात ऽवतुकाः
थाकुक् लुखां
दुतपित याय्
माःगु अवस्था नं
वःगु खः । अनं
हाकनं न्यत जुया
किलाघः, इतुंबहाः
थ्यंकीगु खः, अन
थ्यनेवं बाजं छम्हाः
दिकी । छायाःसां
अनं सिंहंसार्थबाहया
ससः केशचन्द्रया
छँ खः ।

नेवाः वस्ती थीथी इलय् थीथी
थासय् जात्रा नखःचखः हनावया च्वंगु
दु । अथे होलिपुन्ह बलय् थँबहीया
बिक्रमशिल महाबिहारय् च्वंम्ह
चकंछःया बिस्कं जात्रा जुइगु खः ।
थ्व जात्रा भगवानबहाल दुने च्वंम्ह
सिंहलसार्थावहुया प्रतिमुर्ति ह्याउँम्ह
छःया जात्रा याइगु खः ।

थंबहीमिपिन्सं थ्व होलिपुन्हि
जात्रायात पाहाँचःऱे कथं प्वाकिजा
नखः धकाः माने याइगु खः । बसन्तथा
लसं स्वां सिमाकचाय् वाउँगु च्वः
जाया वइगु इलय् चिकुला फुनाः
ताला, न चिकु न तात्व, ल्याय्मुह
ल्यासेतय् नं बैशं मन चंचं धाइगु, देय्
न्यंक होली म्हितीगु बखतय् जुइगु थ्व
तसकं न्हेय्पुगु जात्रा खः ।

चीर स्वाङ्गु अष्टमी खुनुनिसें
अबिरया होली शुरु जुङ्गु खःसां तबि
थौकन्हे बिकृति अप्वः जुसेलित छन्हु हे
जक सीमित जूवंगु खः ।

होली पुन्हि खुनु सुथय् सकभनं
होली म्हिहति । थँबहिली थ्वखुनु
बान्हिलिसा गुभाजुपिन्स बिधिकथं
पुजायानाः मूचुकया क्वथाय् तयातःम्ह
चकंछःयात भगवानबहालया
दक्षिणपतिइ च्वंगु तुं चुकय् लुइपाखे
स्वःगु फल्चाय् पःमांत व दगूतसें
ल्हवनाः ब्वय् हइ । थ्व दिनय् थँबही
त्वाः खलःया (ज्यापुतय्) मूधिमे नासः
पुजा भवय् न्याइगु खः ।

सन्ध्या इलय् भव्यं नय् सिधय्यं
गुरुं न्यायकेत त्वाःछिं तुं चुकय् धिमे
थानाः धुन्या हिइकाः मुनी । अनं लिप
खलःया बच्चि जःपिंसं तुं लिकसं
च्चनाः दाफाः थाना म्ये हाली । थँबही
त्वाःया चिजः खलःपाखें धुन्या हिइकाः
धिमे थानाः मुनी । बाजंया रौनकं अन
छ्वालिं जात्रा स्वैपिं जायक दइ । थ्व हे
कथं कजि पःमां खलः गुथियारपिंसं गुरुं
न्यायकेत दक्क ब्यवस्थित यानाच्चनी ।
स्वतजाःगु छत्र, चखमुया छत्रया नं
ज्वरजाम याइ । अथेहे गुप्वाः यग्गागु
इताः मत नं च्याकी । गुभाजुपिन्सं तुत
ब्बनाः पुजा यायां द्रःयात बल्लाःपिंसं
ल्ट्वनाः चुकय् थुखेउखे इयुथिधु याइगु
खः

थ्व द्यःया दुने गुभाजुपिं च्वनीगु
खः । थ्व इलय् गुलिस्यां बस लालां
वनि, गुलिस्यां अबिरं छ्वाकी, गुलिस्यां
स्वतँ दूगु छत्रं कुइकाः चाः हीकुहीकुं
द्यःया ल्यूल्यु ब्वाँय्ब्वाँय् जुइ, अथेहे
छतँ दुगु मेगु छत्रं न कुइकाः चाः हीकुहीकुं
वनि, गुली अबिर छ्वाकल उलि हे



दःया ख्वाः भ्रभ्रं मुसुंकाः थें, न्त्यू थें
 खने दइ । थथे दःयात गुधू तक न्याय्
 का फल्चाय् हे बिराजमान याकि ।
 थुकियात हे गुरं न्याय्कीगु धकाः
 धाइगु खः । थथे बहनि गुरं न्याय्के
 क्वचाय्वं निगू धिमे खलःया धुन्या
 दःफल्चाय् जर्वखर्वचिनाः सकलें
 थःथःगु छैं लिहौवनी । दःयात नं चछि
 अन फल्चाय् पाः च्वनाः चाहीकि ।

कह्यखुनु सुथय् हाकन थँबही
 त्वाःया तजः खलःपाखँ द्यःया न्ह्यःने
 दाफा भजन याइ । सकले द्यःके वयाः
 पुजा याइ । थ्वखुनु मू द्यःजात्रा याइगु
 जुया द्यः यंकेंगु लैय् सुथनिसे जात्रा
 सिमधः तले सुचं बिइकथं तानाद्यः
 चाहिकी । थ्व ज्याय् ल्हुतिं च्वय्च्वपिं
 पुतुवारतसें गं थानाः चाहिलीगु खः ।
 थथे चाह्य् वनीबले गुलिसिनं दक्षिना
 बी व आमदानी फुकं इमिसं हे काइ ।

बान्हीलपा मू जात्राया नीतिं
चकंद्यःयात फल्वां ल्हवनाः भगवान
बहाःया न्ह्यःने लँयू पारी ससुद्यःया
देपाय्च्वंगू दबुली बिराजमान याकी ।

थ्वखुनु द्यः जात्रा याइबलय् लुँ
आखः वः आखः दुगु प्रज्ञापारमिता
सफू नं द्यःलिसें जात्रा याय्माः । धाय्
तला थ्व सफूया आखः मञ्जुश्री नं
च्वयातःगु धाइ । थ्व स्वयत् ल्हासानिसें
सँय्त यक्व वः । जात्राया इबलय् थ्व
सफू खतय् तयाः चाहिकी । थथे कुबिया
चाहिकेत प्यंगथायापिं वलाछिमित वय्
माः । थुकिया पलेसा इमित पःमांतसें

भ्रिफा: जाकि बीगु चलन दु । व जा
थुया: नयूत तरकारी धा:सा थपिसं हे
ज्वना वया: थुया: नइगु खं धा:गु ख: ।
थथे द्य:या ल्यूल्यू प्रज्ञापारमिता सफू नं
जात्रा याइ ।

ई त्याःलिसे न्हयखुनु थें बाजं
खलःत दक्क मुनी । थ्व खुनु थेंबही
चिजः खलःतय् नासः पुजा भ्वय्
न्याइ । ईपिं नं भ्वय् सिधय्काः थ्यंकः
वइ । अर्नील पैयुताः खलः धकाः
पःमांःतय्यु बिस्कं लवां पोंगा बाजं
नं पित हइ । अथेहे प्यंगःशामय् च्वपिं
वलाछिमित नं पछिमा थानाः बाँसुरी
पुयाः द्यः लँस्व वइ । थथे सकलें मुने
धुकाः गभाःजु, पमां, ज्यापुत सकलें
जानाः बबलाःपिंसं द्यःयात ल्हवनाः
बुलुहुं क्वत यंकी ।

थथे जात्राय् न्हापलाक धिमे
निथ्वः अनं दाफा खलः, अन हाकनं
बासुरी खलः, अले द्यः दथुइ तयाः
यंकी। वयां लिपा हाकनं पँयूताः
खलःलिसें यक्व लस्कर ल्यूल्हू वनी।

थथे लस्करी ज्याथा जुया न्ह्याः
वनी । छःयात केपु मब्यूतले ज्याथा
त्वाःयाम्ह थाकुली छांलाना च्वनी
धैगु खँ न्यना । अनं छुस्या बहाः । मुस्या
बहाः, असं, भोताहीत जुयाः मासंगल्ली
जनबहाः पिचायुकी अनं वंघः जुयाः
लायकू हनुमानध्वाका कुमारी छँ मरुसतः
थ्यंकाः लित हइगु खः । अनं हाकनं
कम्पुकोट जुयाः प्याफल पिचायुकी ।
लिपा अनं लं दध्वी हे क्यान्टेन दय

काः लुखा तयाबिसेलि द्यःयात ग्वतुकाः
थाक्कु लुखां दुतपित याय्माःगु अवस्था
नं वःगु खः । अनं हाकनं न्यत जुया
किलाघः, इतुंभाः थ्यंकीगु खः, अन
थ्यनेवं बाजं छभाः दिकी । छायाःसां
अनं सिंहसार्थबाहया ससः केशचन्द्रया
छै खः ।

अनं थाय्मदु, क्वाःबहाः,
थँबही भगवाति द्यःया न्ह्यःने वनी ।
थन थ्यंकाः नं बाजं थाइमखु । छाय्
धाःसा अन नै कलाः दु हाँ अनं
पकनाज्वः, गल्कोपाखाय् थ्यंकः वइ ।
गल्कोपाखाय् उत्तरपति स्वकाः द्यःया
बुँ क्यनी । अले “जवंखवं लुँ बुँ वहः
बुँ जिगु बुँ जक भुयु भुयु” धकाः लवां
पोंगा पुइ । अनं हाकनं गाःहिंति जुयाः
द्यःयात भगवान बहाःया मू चुकय् दुने
देपापति दिदी ।

थ्वयां लिपा हानं गुरुजुपिन्स
ज्यूगु मज्यूगु पुजा कया वल धकाः
ब्बबीगु चलन दु। थथे ब्बबीवं द्यःया
ख्याः खिउंसे च्वंकी। उखुनु चान्हय्
अन हे बाय् तयाः कन्हय् खुनु नीसी
याकाः दुत बिज्याकी। थथे खःसां
आः मू जात्रा खुनु गुबलें फुसिंख्यः
यापिन बाजं, गुबलें बाछै बाजं थानाः
चाहिंकेगु याना हयाच्चंगु दु।

पर्यटकिय क्षेत्र ठमेलयू ज्वीगु थ्व
जात्राया महत्व यक्व दु । अथे जुयाः
थुकियात ब्यबस्थितकथं न्ह्याकेमाः
धकाः सः दनाच्चंगु दु। फुक्कासिगु
ग्वहाली मदयूक थ्व सुथां लाइमखु ।



राम प्रजापति
प्रोप्राइटर

हारती मिठाई भण्डार

(शुद्ध शाकाहारी)

कालिमाटी चोक, टंकेश्वर मार्ग, काठमाडौं ।
फोन नं. : ०१-५३७२९९९, मो. ९८०३९८०६९९

यहाँ:- विवाह, व्रतबन्ध, पार्टी, पिकनिक, तथा अन्य शुभ कार्यको लागि अर्डर अनुसार मिठाईहरू तयार गरिन्छ ।

[illegible]





यल मनपाय् कर मपूपिनिगु धलः दयेकल

लहना डेस्क

यल महानगरपालिकाबासीं २०७४ सं स्थानीय तहलय् जनप्रतिनिधि वयेधुंकाः कर मपूपिं तःधंगु दरदातायात कानुनी दायरय् हइगु अपेक्षा याःगु खः । तर, जनप्रतिनिधि वःगु खुदै दयेधुंकाः नं महानगरपालिकायात सम्पत्ति, व्यवसायी, बहाल कर मपुसें अटेर याना वयाच्वीपि नांजाःगु स्कुल, कलेज, अस्पताल निसैं सपिड मल, होटेल, सिनेमा हल, हाउजिङ कम्पनी तकयात करया दायरय् हये फयाच्वंगु मदु ।

यलय् तःधंगु कर दातां महानगरपालिकायात कर पुलेगु नितिं सम्पत्ती विवरण बुभ्ने यानाच्वंगु मदुसा महानगरपालिकां कडाइ नं यानाच्वंगु मदु । यल मनपां कर म्होयेत बेवास्ता याना वयाच्वंगु अवस्थाय् यैं महानगरपालिकां धाःसा तःधंगु दातातयूत राजश्वया दायराय् हयेधुंकूगु दु । यल महानगरपालिकाया तथ्यांक कथं महानगरपालिकायात कर मपूपिं हाउजिङ कम्पनीइ २३ नम्बरया मेरो सिटी हाउजिङ, २८ नम्बरया हात्तीवन हाउजिङ, २३ र २४ नम्बरया सिभिल होम्स, धापाखेलया सिभिल अपार्टमेन्ट, ग्वाकोया किष्ट हाउजिङ, खुमलटारया सिटी वस्ती विकास कम्पनी खः । थ्व बाहेक महानगरपालिकाय् मेगु गुलि हाउजिङ कम्पनी सञ्चालन जुयाच्वंगु दु व उमिसं कर पू मपू धइगु विवरण तक महानगरपालिकायाके मखु ।

कर मपूपिनिगु धलखय् हात्तीवनया लिटल एन्जेल्स कलेज, कुसोम कलेज, मेगा कलेज, महानगरपालिका-४ सं बेखाज पार्टी प्यालेस व उग्रचण्डी क्याटरिङ, २० नम्बरया कुमारी व अग्नि पार्टी प्यालेस व ९ नम्बरय् दुगु बालकुमारी पार्टी प्यालेस, लगनखेलया साभ्ना भवन, ग्वाकोया गुण सिनेमा हल, सिभिल सेभिड एण्ड क्रेडिट, राष्ट्रिय सहकारी महासंघ, भूतपूर्व सैनिक संगठन, बाल संगठन भवन, साभ्ना यातायात नं लाः ।

थ्व बाहेक महानगरपालिकाय् थ्यंमथ्यं न्यासः स्वयां अप्व वित्तीय संघसंस्था दु । थ्यंमथ्यं ९० प्रतिशत कर पुलाच्वंगु मदु । पाटन औद्योगिक क्षेत्रया उद्योग, कलकारखाना नं कर छले याःगु धलखय् दु । महानगरपालिकाय् २०७८ या जनगणना कथं ७७ हजार १ सय ५९ छैंखा दु । फुककं धयाथे छैं बालं



बियातःगु दु । तर, कर धाःसा पूगु मदु । व्यावसायिक प्रयोजनया नितिं छैं बालं बीपिसं नं वास्तविक स्वयां म्हो जक बाः पुलागु सम्भौता क्यनाः कर छले यानाच्वंगु दु ।

स्थानीय स्वायत्त शासन नियमावली आठौं संशोधन २०७३ कथं सरकारी व निजी स्वामित्वय् दुगु गुगुं नं संस्थां थःगु छैं व्यावसायिक प्रयोजनया रुपय् छ्यलधाःसा कर पुलेमाःगु प्रावधान दु । थुकिया बारे महानगरपालिकां अनुगमन नं याये फयाच्वंगु मदु ।

महानगरपालिकां चालु आर्थिक दैय् कर छले याःगु कम्पनीया राजश्व मूल्यांकन याःगु मदु । २०७८/७९ सं याःगु मूल्यांकन कथं लगनखेलया साभ्ना भवनं १ करोड ५० लाख तका, राष्ट्रिय सहकारी विकास बोर्ड २ करोड तका, बाल संगठन भवनं १ करोड ५० लाख तका, लिटल एन्जेल्स कलेजं १ करोड तका, गुण सिनेमा हलं ३ करोड तका, साभ्ना यातायातं ३ करोड तका कर पुलेगु ल्यैं दनि ।

कर मपूपित छैं बुं मीगुया लिसे बैंक दिं तयेफइया लिसे सरकारी सेवा सुविधां वञ्चित यायेगुया लिसे छैंया टेलिफोन व लःया मबीगु, फोहोर ममुनेगु थेंज्याःगु कारबाही यायेफइगु अधिकार दु । तर, महानगरपालिकां कर मपूपिं तःधंगु छम्हेसित हे कारबाही याःगु मदु । राजश्व संकलन यायेत यल महानगरपालिकाया उपप्रमुख मञ्जली शाक्य वज्रचार्यया संयोजकत्वय् न्याम्ह दुजः दुगु राजश्व परामर्श समिति नीस्वनातःगु दु । समितिइ ललितपुर महानगरपालिका-२४ या वडाध्यक्ष दिनेश जंग पाण्डे, १६ नम्बरया वडा सदस्य बबिता श्रेष्ठ, निजी व्यवसायीया पाखे ललितपुर उद्योग

वाणिज्य संघ व घरेलु तथा साना उद्योग महासंघया प्रतिनिधि दु ।

अथे खःसां नं कर छले याःपित कानुनी दायरय् न उपप्रमुखं पहल यात न त नगर प्रमुख चिरीबाबु महर्जनं याःगु दु । वडा अध्यक्ष व निजी व्यवसायी संस्थाया प्रतिनिधित नं सुम्क च्वनाच्वंगु दु । यल महानगरपालिका प्रवक्ता राजु महर्जनं कर छले यानाच्वीपि तःधंगु करदातायात कानुनी दायराय् हयेगु नितिं सुरक्षा माःगु तर, नगर प्रहरीया ल्याः म्हो जूगुलिं करया दायराय् ल्याउन हयेमफुगु दाबी यानादिल । वय्कलं धयादिल, ‘नर्कतिनि जक न्हूपिं नगर प्रहरी भर्ना यानागु दु । आः बुलुहुं अनुगमन यानाः करया दायराय् हयेगु जुइ । अटेर याइपित कानुन कथं कारबाही यायेगु जुइ ।’ तःधोपि व्यवसायीयात करया दायरय् वयेत पौ च्वयेधुनागु धापू प्रवक्ता महर्जनया दु ।

यल महानगरपालिकां तःधोपि व्यवसायीयात कर छले यायेगुलिं छुट बिउसां नं चीधंगु व फुटपाथ व्यवसायीयात धाःसा कडाइ यायेगु यानाच्वंगु दु । यल बालकुमारीइ चटपटे व्यवसायी याइम्ह दोलखया माया राईयात कर मपूगु धासें यलया नगर प्रहरीं ठेला गाडा जफत यानाः बै पुइकेगु ज्या यानाच्वंगु दु । ठेला गाडाय् कनि छुयाः मीम्ह काभ्रेया सविना श्रेष्ठया भोगाई नं अथे हे दु । नगर प्रहरीं लिनुमतु लिनाः हैरान यायेवं उमिसं यल महानगरपालिकाय् दर्ता जुयाच्वंगु स्थानीय सप्तखेल टोल सुधार समितियात लय् ५ सय तका शुल्क पुलाच्वंगु दु ।

यल महानगरपालिकाया प्रवक्ता महर्जनं कानुनी दृष्टिकोणय् चीधोपि वा तःधोपि करदाता समान दुगु खँ

५५ हजार तका निसे १५ लाख तका करया दर कायम यानातःगु दु । यल महानगरपालिकाय् स्वाःगु साविकया गाविस धापाखेल, सुनाकोठी व हरि सिद्धिया नितिं पिच सतकलिसे स्वाःगु जग्गाया दर प्रति रोपनी ३२ लाख ५० हजार तका, कच्ची सतकलिसे स्वाःगु जग्गाया १८ लाख ७० हजार तका व गोरेटो लैं लिसे स्वाःगु जग्गाया ११ लाख तका करया दर क्वःछिनातःगु दु ।

ललितपुर महानगरपालिका आर्थिक ऐन २०८० कथं ३० लाख तका कर लगे जुइगुलिं ५ सय तका, वयां लिपा २० लाख तका ०.०८

यल मनपायात कर मपूपिं व सम्पत्ती विवरण बुभ्ने मयाःगु संघसंस्था

- | | |
|---------------------------|----------------------------|
| - मेरो सिटी हाउजिङ | - कुमारी पार्टी प्यालेस |
| - हात्तीवन हाउजिङ | - अग्नि पार्टी प्यालेस |
| - सिभिल होम्स | - बालकुमारी पार्टी प्यालेस |
| - सिभिल अपार्टमेन्ट | - साभ्ना भवन |
| - किष्ट हाउजिङ | - गुण सिनेमा हल |
| - सिटी वस्ती विकास कम्पनी | - सिभिल सेभिड एण्ड क्रेडिट |
| - लिटल एन्जेल्स कलेज | - राष्ट्रिय सहकारी महा संघ |
| - कुसोम कलेज | - भूतपूर्व सैनिक संगठन |
| - मेगा कलेज | - बाल संगठन भवन |
| - बेखाज पार्टी प्यालेस | - साभ्ना यातायात |
| - उग्रचण्डी क्याटरिङ | |

कनादिल । ‘महानगर दुने न्ह्यानाच्वंगु थ्यंमथ्यं ६०/७० प्रतिशत साना व्यवसायीं कर पुलाच्वंगु मदु । उमित नं क्रमशः कानुनी दायरय् हयेगु जुइ,’ वय् कलं धयादिल ।

ललितपुर उद्योग वाणिज्य संघया वरिष्ठ उपाध्यक्ष सुशन महर्जनं महानगरपालिकाय् व्यावसायी दर्ता जूगु मिति निसे कर कायेमाःगुलिं महानगरं २०६८ सालं निसे कर कायेगु यानाच्वंगुलिं व्यावसायीत करया दायरय् वये चाहे मज्जु तर्क यानादिल । वय्कलं धयादिल, ‘महानगरपालिकां राजश्व अप्वयेकेत करया दर स्वयां नं दायरा अप्वयेकेगु पाखे ध्यान बी फयाच्वंगु मदु ।’

महानगरपालिकां मू सतक लिसे स्वाःगु जग्गाया प्रतिरोपनी २२ लाख तका निसे १ करोड २१ लाख तका, सहायक मू सतकलिसे स्वाःगु जग्गाउ प्रति रोपनी ४० प्लाख ७० हजार तका निसे ७० लाख ४० हजार तका, कच्ची सतकलिसे स्वाःगु जग्गाया १५ लाख तका निसे २२ लाख तका, गोरेटो लैं लिसे स्वाःगु जग्गाया ८ लाख

प्रतिशत, वयां लिपा ५० लाख तकाय् ०.१५ प्रतिशत, वया. लिपा १ करोड तकाय् ०.३ प्रतिशत व वयां लिपा न्ह्याक्वः हे जूसां नं ०.५५ प्रतिशत करया दर क्वःछिनातःगु दु । छैं बाःया करा धाःसा सम्भौता जूगु ध्यबाया १० प्रतिशत असुल यायेफइगु कानुनी व्यवस्था दु । महानगरपालिकां सम्पत्ती, छैं बाः, व्यवसाय, जडिबुटी, कवाडी व जीवजन्तु निकासी, सवारी साधन, विज्ञापन, मनोरञ्जन कर यानाः थीथी भिगू शिर्षकय् कर कायेगु यानाच्वंगु दु ।

केन्द्र, प्रदेश व स्थानीय तहया स्वामित्वय् दुगु छैं व जग्गा, सरकारी अस्पताल, गुठीया स्वामित्वया, मुनाफाया उद्देश्य मतसें सञ्चालन यानाच्वंगु सरकारी शिक्षण संस्था, कम्पनी, समिति, प्राधिकरण, बोर्ड व सरकारी संस्थानया छैं जग्गा, धार्मिक संस्था (मन्दिर, परम्परागत तथा सांस्कृतिक गुथिया छैं, मठ, गुम्बा, विहार, चर्च, मस्जिद) या हकय् धाःसा घर जग्गा कर पुलेम्वाःगु व्यवस्था यानातःगु दु ।

हरेक मंगलवार
राष्ट्रियताको लागि समर्पित



मेरो साप्ताहिक

मेरो साप्ताहिक Mero Saptahik

माला: माला: ब्वनादिसैं ।



Sweet Cave

(जीवन दाईया पसः)

Kalimati, Kathmandu, Nepal

Tel: 4275511, 9741112777, 9851063000

यहाँ भोज तथा पार्टीहरूको लागि चाहिने स्पेशल दही, पनिर, लाखामरी, लालमोहन, बर्फी, रसबरी तथा अरु विभिन्न परिकारका मिठाईका लागि सम्पर्क राख्नुहोस् ।

आउटडोर भेज क्याटरिङ पनि गरिन्छ ।

ज्यापु महागुथि नेपाःपाखें उच्च शिक्षा कायेत ताःलाःपिंत हन



लहना वाःपौ/ ज्यापु महागुथि यें महानगर समितिं थुगु दैय् उच्च शिक्षा कायेत ताःलाःपिं ब्वमिपिंत हंगु दु । यैंया राष्ट्रिय सभागृहय् छगू ज्याइवःया

पाहाँ कथं यें महानगरपालिकाया पुलांम्ह मेय् विद्यासुन्दर शाक्य, ज्यापू महागुथिं यें नेपाःया नांयः सत्यनारायण डंगोल लिसें थीथी ब्यक्तिपिं उपस्थित जुगु खः ।

ज्याइवलय् यें दुने उच्च शिक्षा कायेत ताः लाःपिं ज्यापू समुदायया थीथी शैक्षिक स्तरं निसें एमफिलतकया ब्वमिपिंत हना-पौं लः ल्हासें हंगु खः ।

ग्वसाः खलकं ब्यूगु जानकारी कथं ज्याइवलय् थ्यंमथ्यं स्वसःत्याः अप्वः ब्वमिपिंत हंगु खः ।

ज्यापु महागुथि यें महानगर समितिंया नायः पंच नारायण महर्जन सकसितं लसकुस यानादिगु खः ।

‘विश्वशान्तिया नितिं बुद्ध शिक्षा माः’

लहना वाःपौ/ बौद्ध विद्वानद्वय रत्नसुन्दर शाक्य व ठाकुर कृष्ण उप्रेतीया निगू सफू मंकाः कथं लोकार्पण याःगु दु । शाक्यं च्वयादीगु ‘बौद्धजगतका स्मरणीय व्यक्ति’ व उप्रेतीं अंग्रेजी भासं नेपालीइ अनुवाद यानादीगु ‘व्यवहारिक विपश्यना ध्यान’ नांया सफू लोकार्पण याःगु खः । धापाखेल बौद्ध बिहारय् सम्पन्न जुगु न्याक्वःगु धम्म डिजिटल दिवसया

इवलय् सफू लोकार्पण याःगु खः । शाक्यं नेपाःया लुम्बिनीइ बूम्ह सिद्धार्थ बुद्धया दर्शन, ध्यान, पञ्चशील तथा समग्रय् बुद्ध धर्म प्रचार याःगु हलिंन्यंकंया ३० म्ह विद्वानया व्यक्तित्वया बारे सफू च्वयादीगु खः । विक्रम संवत् २०४८ साल निसे सफू च्वयेगु ज्या न्ह्याकादीम्ह शाक्यं थ्व स्वयां न्ह्यः ४४ गू सफू पिथना दीधुंक्नु दु । मेम्ह च्वमि उप्रेतीं सतिपट्टान विपश्यनाचार्य अग्गमहापण्डित महासी सयादों पाली भाषाय् च्वयादीगु सरफूयात अंग्रेजीं नेपाली भाषाय् अनुवाद यानादीगु खः । वय्कःपिनिगु सफूयात अखिल नेपाल भिक्षु महासंघया अध्यक्ष भिक्षु फ्राखु विशाल धम्मशोभन महास्थवीर, सचिव



भिक्षु निग्रोध महास्थवीर, शासनधर धम्मचारिया भिक्षु जाणाबुधस्थवीर, धम्म डिजिटलया अध्यक्ष भिक्षु जनक व यल महानगरपालिकाया प्रवक्ता राजु महर्जन मंकाः कथं लोकार्पण यानादीगु खः ।

ज्याइवलय् लोकार्पण याःगु सफूया बारे टिप्पणी यानादिसें भिक्षु जाणाबुधस्थवीर व परियत्ति सधम्म कोविध लोचनतारा तुलाधरं समीक्षा यानादीगु खः । ज्याइवलय् मूपाहाँ कथं भायादीम्ह अखिल नेपाल भिक्षु महासंघया अध्यक्ष भिक्षु फ्राखु विशाल धम्मशोभन महास्थवीरं पाली भासं च्वयातःगु बुद्ध धर्मया मू ग्रन्थ त्रिपिटकं विश्व शान्तिया निितिं ग्वाहालि याःगु दाबी

यानादिल । कालान्तरय् त्रिपिटकयात थीथी भाषाय् अनुवाद याःगु जानकारी बिसें वय्कलं मू ग्रन्थं साभार यायेफत धाःसा वास्तविक धर्म, दर्शन, सिद्धान्त प्रचार जुइगु खँ कनादिल ।

बुद्ध शिक्षा व्यवहारिक जूगुलिं लिपांगु इलय् हलिंन्यंक प्रचार जूगु दाबी नं वय्कलं यानादिल । आःया अवस्थाय् बुद्ध शिक्षा अपरिहार्य जुगु धासें विश्वया थीथी देशय् जुयाच्चंगु युद्ध अन्त्य यायेत बुद्ध शिक्षां ग्वाहालि याइगु वय्कःया धापू खः । ज्याइवलय् बुद्ध धर्म सम्बन्धी थीथी सफू व ग्रन्थयात डिजिटलाइजेसन यानाच्चानागु जानकारी बिसें धम्म क्वीज एप्लिकेसन शुभारम्भ याःगु खः ।

बुद्धया ज्ञां न्यंकेत ज्ञानमाला भजन प्रभावकारी



लहना वाःपौ/बुद्धया शान्ति शिक्षायात संगीतपाखे न्ह्यब्वयेगु ज्ञानमाला भजन अभियानं बुद्धया ज्ञानपाखे मनूतयूत सकारात्मक सोच व शान्ति स्थापना यायेत तिबः चूलाःगु खँ ज्याइवःया वक्तातय्सं धाःगु दु । नेपाल राष्ट्रिय ज्ञानमाला समिति अन्तर्गत ललितपुर क्षेत्रीय उपसमितिया खुक्वःगु वार्षिकोत्सव व छन्हुया ज्ञानमाला भजन न्ह्यब्वयेगु ज्याइवलय् वक्तातय्सं उगु खँ धाःगु खः । ज्याइवःया उलेज्या यानादिसें भिक्षु भद्रीय महास्थविरं बुद्धया ज्ञानयात जनजनय् न्यंकेगु आज्ञु कथं संगठित समितिं देय्-न्यंकं ज्या यानाच्चंगुलिं सराहना यानादिल ।

ज्याइवलय् गोदावरी नगरपालिकाका मेयर गजेन्द्र महर्जन जीवनया सार्थकता व आनन्दया निितिं बुद्धया ज्ञान न्यनाः उकियात पालना यायेमाःगु खँय् बः बियादिल । वय्कलं थुगु अभियानय् नगरपालिकां तिबःया लिसें ग्वाहालि यायेगु प्रतिबद्धता प्वंकादिल । ज्याइवलय् समितिंया केन्द्रीय अध्यक्ष रमणा श्रेष्ठ बुद्ध जन्मभूमी नेपालय् ज्ञानमाला भजनया अभियानं मनूतयूगु व्यवहार हिलेगुया लिसें मैत्री, करुणाय् आधारित समाज दयेकेत महत्वपूर्ण तिबः बिउगु खँ धयादिल ।

गायिका तर्क जुयादीम्ह श्रेष्ठ देय्

न्यंक न्यनाच्चंगु ज्ञानमाला भजन समूह, संघसंस्थायात छपें यानाः आध्यात्मिक चेत लिसें भजनया गुणस्तर थकायेत समिति क्रियाशील दुगु खँ धयादिल । ज्याइवलय् समितिंया महासचिव इन्द्रमुनि शाक्य ज्ञानमाला भजनया राष्ट्रिय अभियान बुद्धया ज्ञान न्यंकेत प्रभावकारी जुगु धापु तयादिल । गीतसंगीत पाखे भजनया प्रस्तुती न्ह्याहेसितं बुद्धया ज्ञानयात थुइके फइगु अभियानया विशेषता जुगु खँ नं वय्कलं धयादिल ।

यल क्षेत्रीय उपसमितिका संयोजक ईश्वरराज वज्राचार्यका कथं यलया २५ गू ज्ञानमाला भजन पुचलं भजन न्ह्यब्वःगु खः ।

नेपाःया न्हापांम्ह मिसा

न्यायाधीश शारदा श्रेष्ठ मन्त

लहना वाःपौ/ नेपाःया न्हापाम्ह मिसा न्यायाधीश शारदा श्रेष्ठ मन्त । पूर्वन्यायाधीश श्रेष्ठ ८४ दैय् महाराजगञ्जस्थित प्रहरी अस्पतालय् मडुगु खँ सर्वोच्च अदालतया सूचना अधिकारी निराजन पाण्डे न जानकारी ब्यूगु दु ।

स्वास्थ्यय् भचा समस्या खने दयेवं उपचार यायेत भर्ना जुयादीगु खः । सर्वोच्च अदालतया न्यायाधीशया कथं श्रेष्ठ विसं २०६१ वैशाख ३ निसे २०६५ जेठ



२१ गते तक न्यायाधीश कथं ज्या यानादीगु खः । वय्कः अधिकृत निसे न्यायक्षेत्रय् ज्या यानादीगु खः । वय् कःया निम्ह काय् दु ।

मांभाय् दिवसया लसताय् चिनाखँ ब्वनेज्या

लहना वाःपौ/ नेपालभाषा परिषदया ग्वसालय् नीन्याक्वःगु मांभाय् दिवसया लसताय् चिनाखँ वाचन ज्याइवः जूगु दु । परिषदया थःगु हे छैय् चिनाखँ वाचन ज्याइवः जूगु खः । चिनाखँ वाचन ज्याइवलय् मूपाहाँ कथं साहित्यकारलिसें नेपाल प्रज्ञा प्रतिष्ठानया उपकुलपति विमल निभाः भायादीगु खःसा विशेष पाहाँ कथं समालोचक साहित्यकार पुष्प चित्रकार भायादीगु खः ।

परिषदया दांभरी मंगला कार्जितया सभापतित्वय् जूगु उगु ज्याइवलय् लसकुस परिषदया दुजः कवि श्रीराम श्रेष्ठ कविकेशरी चित्तधर हृदय नं च्वयादीगु ‘नेपालभाषा’ नांया चिनाखँ ब्वनाः यानादीगु खः । ज्याइवलय् प्रज्ञा प्रतिष्ठानया प्राज्ञ मातृभाषा विभागया कजि अगिव बनेपालीलिसं नेपालभाषा ख्यःया साहित्यकारपिं व कविपिसं थःथःगु चिनाखँ वाचन यानादीगु खः ।

मेयर बालेनया ...

निसें तलब नये खनाच्चंगु मडु । प्रमुख प्रशासकीय अधिकृत थीथी विभागय् चेक च्वयाः ध्यबा छ्वइगु खःसा वंगु स्वला न्ह्यवीनसें ध्यबा मवनेवं तलब नकेत थाक्याच्चंगु खः । थ्वहे दथुइ मेयर साहया यु ट्युबरतय्सं धाःसा यें महानगरपालिकाया कर्मचारीया भिडियो दयेकाः सरकारया कारणं तलब नके मफुगु धकाः प्रचार यानाच्चंगु दु ।

मेखे सरकारं धाःसा दुम्ह कर्मचारीयात ज्या मयाकू धासें यें महानगरपालिकाय् न्हूम्ह प्रशासकीय अधिकृत छ्वयेत तयार मडुगु खँ सीदुगु दु । सामान्य प्रशासक मन्त्रालयं कर्मचारीया छ्वयेगु ज्या याइगु खः । तर मन्त्रालयया सहसचिवत यें महानगरपालिकाय् वनेत तकं इच्छुक मजुयाच्चंगु खँ सीदुगु दु । लिसे मन्त्रालयं यें महानगरपालिकाया प्रमुख प्रशासकीय अधिकृतया बारे निर्णय मजु तले मेम्ह छ्वयेगु खँय् विमति प्वंकाच्चंगु दु ।

खोनाया ...

खोना, बुंग व सुनाकोठीयात स्थानीय स्वायत्त शासन ऐन कथं सांस्कृतिक क्षेत्रया रुपय् विकास यायेगु प्रस्ताव यायेधुनागु जानकारी नं बियादिल ।

ज्याइवलय् यल मनपा २१ वडाया अध्यक्ष रविन्द्र महर्जन थः खोनाया संस्कृति सम्पदाया रक्षाया निितिं तत्पर दुगु खँ धयादिल । लिसे वय्कलं खोनाया नेवाः बस्ती व सम्पदा ल्यंकेगु निितिं फास्टट्राय्कया एलाइन्मेन्ट स्वक्वः तक हिले धुनागु खँ कनादिल ।

सफू रेसिस्टेन्स अफ खोना (खोकना) नेपालभाषा, नेपाली व अंग्रेजी यानाः स्वंगू भाषाय् पिहां वःगु खः । सफुतिइ खोनाया सांस्कृतिक, ऐतिहासिक पक्षया लिसें दमन, हाखः प असोज २० गते वा पीगु इवलय् जूगु विद्रोहया गतिविधि दुथ्याकातःगु दु । हलिं नेवाः दबू नेपाः देय् मूक्वःया व्यवस्थापनय् जूगु ज्याइवः नेपाः च्याप्टरका अध्यक्ष सुरेन्द्रभक्त श्रेष्ठया सभापतित्वय् जूगु खः ।

रञ्जना लिपिं पिहाँ वयाच्चंगु रञ्जना लय्पौ ब्वनादिसँ/ब्वंकादिसँ

रञ्जना लिपि

रञ्जना लिपि

रञ्जना लिपि

प्रचलित नेपाललिपिं पिहाँ वयाच्चंगु म्हसीका लय्पौ ब्वनादिसँ/ब्वंकादिसँ

म.मी.क. लय्पौ

म.मी.क. लय्पौ

म.मी.क. लय्पौ

फिरोज सिंहयात बेलायतय् सांस्कृतिक आतिथ्य आइकन हना



लहना वाःपौ/नेपाःया आतिथ्य व खाद्य क्षेत्रया गौरवकथं किपूया नांजाःगु नेवाः रेस्टुरेन्ट ससः त्वाःया नायःयात बेलायतय् सांस्कृतिक आतिथ्य आइकनया हना लःल्हाःगु दु। थ्व हना वय्कःयात अन्तराष्ट्रिय स्तरय् नेवाः नसा व पाहाँया प्रवर्द्धन व संरक्षणय् याःगु ज्वःमदुगु कुतःया निती

लःल्हाःगु खः।

ससः त्वालं नेवाः नसाय् स्वादया शुद्धता व सांस्कृतिक परम्परा न्ह्यब्वयाः प्रामाणिकताया प्रतीक जगु दु। नायःया ल्याखं रेस्टुरेन्टयात नेपालय् जक मखसैं अन्तराष्ट्रिय स्तरय् नं नेपाःया नसायात लोकहवाकेत न्ह्यलुवा जुयाः ज्या याःगु दु। पारम्परिक पाक कलां

परम्परा कायम यासैं व समकालीन आतिथ्य कुतःयात दुथ्याकेगु वय्कःया दृढ प्रतिबद्धता हे वय्कःयात थुगु हना लःल्हाःगु खः।

बेलायतय् जगु ज्याइवल्य पाहाँ व सांस्कृतिक उद्योगय् सकरात्मक योगदान ब्युपिन्त हनेज्या याःगु खः।

थुगु सिरपाःया निती सुभाय् देछासैं वय्कलं धयादीगु दु, “थ्व सिरपाः जिगु निती जक मखु, सकल ससःत्वाः परिवार व नेवाः समुदायया निती खः। जिमिगु कुतः न्ह्याबलें भी पुर्खाया स्वाद व परम्परायात त्यकेत व न्यकेत खः। नेवाः भव्ययात अन्तराष्ट्रिय स्तरय् मूल्यांकन याःबलय् थ्व सिरपालं जिमित अभ्र हःपाः बी व जिमित जिमिगु कुतःयात न्ह्यज्याकेत उत्साहित याइ।”

हलिं नेवाः दबू पोर्चुगल च्याप्टरय् जोशी नियुक्त

लहना वाःपौ/हलिं नेवाः दबूया छुं दिं न्ह्यः जगु मुँज्यां राजेश जोशीया नायःसुइ हलिं नेवाः दबू पोर्चुगल च्याप्टर स्वनेज्या याःगु दु।

वःगु जानकारीकथं उगु ज्यासना पुचःया न्वकु सुजेन्द्र श्रेष्ठ, महासचिव पवनबाबु डंगोल, छ्याञ्जे सुनिता रज्जित, दाभरिं गणेश श्रेष्ठ, ल्यूदाभरिं समिर श्रेष्ठ व दुजलय् अनिल तुलाधर, मथुरा श्रेष्ठ, देव नारायण श्रेष्ठ, सुवास मल्ल, लक्ष्मी श्रेष्ठ, सरोज श्रेष्ठ व निकिता जोशी ल्यःगु खः।

थुकिं हलिं नेवाः दबूपाखें न्हापा गठन यानातःगु फुक्क स्थानीय संगठनयात प्रतिस्थापन याइगु केन्द्र जारीयाःगु प्रेस विज्ञप्तिइ न्ह्यथनातःगु दु। पोर्चुगलय् संगठन स्वनेगु निती डब्लुएनओ युरोपया संयोजक कुमार नापितया नेतृत्वय् युरोपेली क्षेत्र दुने च्याप्टर गठन यायगु व सशक्तीकरण यायेगु ज्या न्ह्यानाच्वंगु नं विज्ञप्तिइ न्ह्यथनातःगु दु।



हलिं नेवाः दबूया केन्द्रीय मुँज्यां न्हगु ज्यासना पुचः ल्ययगु ज्या ज्यासना पुचः व पोर्चुगलया जःपिनि जगु खः।

भित्तुना देछा



नेपालय् च्वनादीबलय् थीथी संघ-संस्थाय् च्वनाः सामाजिक सेवाया ख्यलय् न्ह्यज्याना च्वनादीम्ह

हनेबहःम्ह भाजु **राजेश जोशी**जु

हलिं नेवाः दबू पोर्चुगल च्याप्टरया नायः पदय् नियुक्त जुयादीगुलिं छिगु कार्यकाल सुथांलाक्क न्ह्यज्याय्मा धइगु मनंतुसैं भित्तुना देछानाच्वना।



हलिं नेवाः दबू नेपाः देय् मूकवः
World Newah Organization Nepal Chapter

बालबालिकामा शिक्षाको पहुँच पुऱ्याऔं

- उमेर पुने वित्तिकै बालबालिकालाई विद्यालय भर्ना गरौं,
- विद्यालयमा बालबालिका रमाउने वातावरण सिर्जना गरौं,
- घरपरिवारमा सिकाइको वातावरण तयार गरौं,
- बालबालिका मैत्री शिक्षण सामग्री प्रयोग गरौं,
- बालबालिकाको रुचिबमोजिम खेल्दै, पढ्दै सिकने वातावरण निर्माण गरौं,
- बालबालिकाको फरक क्षमता अनुसार सिकाइको अवसर प्रदान गरौं,
- बालबालिकालाई पढाईका साथसाथै अतिरिक्त क्रियाकलापमा समेत सहभागी गराऔं।



नेपाल सरकार
विज्ञापन बोर्ड

छत्रपाटी निःशुल्क चिकित्सालय (अस्पताल)

“स्त्रीय शलभ स्वास्थ्य सेवा सकसियां निती, असहायया निती जक निःशुल्क”

उपलब्ध सेवा

२४सै घण्टा सेवा

- ईमरजेन्सी
- प्याथोलोजी
- एक्स रे
- ई.सी.जी
- औषधि पसल
- अन्तरंग सेवा

शल्यक्रिया

- मोतिबिन्दु
- ज्वरत हतरी
- नाक बाब घाँटी सम्बन्धि
- हाडजोर्नी तथा नसा सम्बन्धि
- शिवा विरकार पिताइ मसीको पत्तर सम्बन्धि

बहिरङ्ग सेवा

- मुटु रोग
- पेट रोग
- युरोलोजी
- स्त्री रोग
- बाल रोग
- कवाल्बर रोग
- दन्त रोग
- आँखा रोग
- जनरल मेडिसिन
- धमन तथा यौन रोग
- नाक काब घाँटी रोग
- जनरल हेल्थ चेक अप
- बाइरोइड
- मधुमेह

मेमेमू सेवा

- ड्रेसिङ
- इण्डोस्कोपी
- कोलोनोस्कोपी
- फिजियोथेरापी
- अल्ट्रासाउण्ड, क्लर इमर र इको
- युरोपेली स्तरको दन्त प्रयोगशाला
- टिएम.टि. हल्टर

२४ घण्टा

ईमरजेन्सी सेवा

७०८ गंगालाल मार्ग, छत्रपाटी, काठमाडौं, फोन: ५३१६१३८, ५३५७९११, ५३६६२२९